



青陽先生文集附錄序

青陽先生文集附錄序

青陽先生文集若干卷武威余忠宣公所著也其
前集若干卷已繡梓行於世續集若干卷及士大
夫忻慕公高風大節播之文辭者又若干卷則維
揚張仲剛氏採諸四方而裒集成編者也所散逸
者猶多仲剛尚訪求之次第附為其用心亦勤矣
夫太上立德其次立功其次立言公之德追配於
古人公之功有補於當時文豈雖公餘事然斥言
隻字必求前世作者之精英而議論雄偉多過人
者使公生前盛日則斯文自可垂示於後柰何值
勝國板蕩以孤軍當日滋之敵竟仗節就死功德

同德

之卓異夫誰可及也余讀公與執政書慨然憂國
家之顛危惻然憫生民之困悴凡攻取平定之計
設施措置之方如指諸掌當時皆苟且偷安譬猶
焚烈火於積薪而卧其上雖言之剴切痛苦曾莫
之恤公死節之志已決於此矣夫公雖視死如歸
彼其國步當何如哉余竊謂國家不幸而有忠臣
士君子不幸而為忠臣夫明良相逢都俞吁咈之
別於大庭不待損驅殞命以為賢也張巡顏杲卿
王彥章諸君子豈不願為稷契哉不幸臨其時而
取義為耳公蓋其儔也使夫居宰輔守民社握兵
符者皆能如公之志則國家安有危亡之患哉

聖朝以忠義勵天下公之祀已載於彞典名已傳
於信史雖其死不為幸而其慷慨英烈之氣凌青
雲而貫皎日者與天地同不朽也仲到以全集示
余徵言余奚容喙辭不獲乃述其槩如右仲到名
毅以孝行稱士林是集之編可見其知所慕云青
城山人王汝玉序

余忠宣公死無後君子悲之遺文固所欲見然不
可多得邵官能輯刻傳布可謂有功於名教矣然
繫群賢請作始敵其半似於公無所增損况方來
為公作者無窮別自為集可也嗚呼安得世之任
方隅者皆斯人乎莆田彭韶謹識

言以人而傳是集之行重其人也安慶板父燮走
承乏四載求舊本重梓弗復歲己卯強藩兵變幸
爾保城勝敵神昭靈貺居多亞司徒李梧山公撫
臨謁謝命走葺宇撥役務得此本梓之忠義正氣
謂之曠世而相感者非耶宜守胡君汝登見而輒
加贊言校梓行其體公之心而急所先務者矣正德
庚辰夏四月望日海岱張文錦謹跋

農民陳一策寫

續編青陽附錄序

忠義之在人心猶元氣之在天地天地雖閉塞而成
冬然元氣之流行未嘗息也人心雖倣擾而成變其
忠義之感激未嘗泯也是以一臣效忠一夫死義後
之君子往往曠百世而相感歎慕愛樂悲傷慨慷形
言著於史見於歌詠自不容已何也人心之天秉彝
之良根於帝降者無不同也豈惟士君子為然雖武
夫悍卒陷於寇戎之黨者亦知敬仰而惋惜乃其本
然之良心觸之而即應彼亦不自覺其呈露也忠
臣義士所以能壽彝倫之命脉保天地之元氣雖分
崩離析之秋人極賴之而植立也歟彼其歌詠之不

足而形之於敬嗟氣嘆之餘者寧不有以與起人心
之忠義而愧夫天下後世為人臣而負不忠之名者
哉元季中原鼎沸大厦之傾頽有非一木可支而
國余忠宣公獨奮忠義堅守孤城為江淮保障無幾
七年而繼之以死值天厭夷德不復可為其臣即之
著炳炳琅琅與日月爭明與雷霆爭烈見者聞者能
不震且肅哉今廟食茲土褒典崇重歲時祀享儼若
生存公雖死其不死者固有在也後公而生過龍舒
者莫不趨拜下塵願識公之遺像既獲瞻慕感留題
廡下以致其景仰之忱以罄其揄揚之美公何以得
此於人人邪忠義發之也人何以得私於公耶本心

之良觸之而發不查其音吐之鏗錡也公平生所著
有青陽集行於世愛公者因輯諸作者之篇什廁於
其間予承乏于斯祇嚴祀典凡公之為民為國可師
法者次第資之以節予政之踈略嘗欲因其舊集攷
訂之以廣其傳遙巡撫都憲彭公弭節江干輒以為
請公謂後賢之作模寫雖多於公之大節似無加損
乃混為一編則恐弗稱况來者之相仍可勝紀哉宜
別置附錄自為一集可也予退而思公之所諭良是
遂蒐羅其有關於忠宣公之大義者采輯而類別之
釐為二卷編梓以行俾我忠宣公之義烈與元氣之
在天地者並行而不悖也於戲公之貫日月而抗雷

寔者寧予一言所能既邪景慕之私則與集中諸君子
同一揆云時

弘治三年庚戌歲九月上旬知安慶府事案中徐傑
拜首謹識

青陽先生忠節附錄

死節本末

淮南左丞余公守安慶之七年兵孤食盡與賊
俱亡麾下士四人脫身至龍興言公之死甚詳
先是有涂穎者龍興進賢人也遠遊京師時公
待制翰林嘗延穎教子及公之守安慶也穎還
自京師舟次城下公復留穎歲餘乃還安慶商
人轉貨易粮于龍興者往來不絕故穎聞公事
蹟為多至正十七年予使至龍興留一歲穎嘗
為予道說隨問隨錄得其大略惜乎其未詳也
嗚呼公之英風偉烈照映千古雖死猶生故予

著之于篇以俟夫脩史者采焉

公諱闕字廷心余姓唐元氏河西武威人也國初遷淮西之廬州因家焉公少失父及長家貧好學不倦教授生徒以養母元統元年科舉法改第一甲三人公自鄉薦過省至於廷對名皆列於第二授同知泗州事入翰林為應奉轉刑部主事以持正不阿忤權貴即棄官歸淮西會有詔脩宋金遼三史起公為翰林脩撰拜監察御史轉禮部員外郎出為湖廣省郎中入為集賢經歷後翰林待制再出食浙東憲司事以母喪居憂淮西至正十一年河南盜起十二年立淮南行中書省于揚州改淮東宣慰司為淮西宣慰司移置廬州是秋九月朝廷奪哀起公為淮西宣慰副使僉都元帥分兵守安慶冬十一月公始到部十日寇至公身率士卒出戰却之即召有司與諸將議屯田守戰之計於是環郡立砦屯兵禦寇令民耕稼其中以給兵食而潛山八社土最饒沃秋成之日常倍他境公悉以為屯民心乃安十三年春夏大飢人相食公出俸為糜賑飢民于雙蓮寺民賴以活者衆時桐城太湖失業之民數萬公招徠安集移文運達中書得鈔三萬錠以賑之民力少蘇是冬朝廷進公副都元帥十四年夏四月下江道通商船方集南臺中丞璽子海牙將水軍泊于城下士卒豪橫爭入城

與民為市公令關吏止之卒與吏墜水死公擒卒下獄中丞大怒堅求出之公曰吾知有法竟杖殺之是秋大旱公為文禱于潛山之神既禱三日大雨民乃大悅八月公以兵平竹蕩湖之寇令民取魚出課會中書省以來七千來益軍食民之悅十五年春公命懷寧縣尹陳秉德專與屯田夏大雨江漲禾沒水者過半一夕城下水湧有物大吼聲振城市公為文以少牢祭之水隨息是秋禾登得糧三萬八月公令士率理城隍復為大防深塹三重勢如牛壁南面瞰江引江水通于隍塹週圍植木為柵城上四面皆起戟樓每議兵督戰公常屋盛唐門仍題武威二字榜之寇至攻城則止宿為衣帶不解夜分下窺率以為常九月朝廷進公宣慰使都元帥是時廣西元帥阿思蘭奉詔率苗兵五萬來平蘄寇自望江舍舟登岸抵于廬州公即移文中書以為苗民不通王化自古攘之不可使窺中國中書以聞詔阿思蘭還軍本土時有苗民作暴公收殺之境內乃安復有來攻抵暮數百騎美于城北中夜賊兵數萬大至向曉公出兵與賊大戰却之萬戶一人戰死會天大雨寇乃散去十六年春朝廷以公戰守功多進公淮南省參知政事守安慶如故二月公遣安慶判官莫倫亦市益浙東商船數百俱往夏四月公命萬戶紀思敬通道江西

招高俅以糧易鹽未幾師陷江東五月趙雙刀陷池
州六月以其衆來攻公率土民與戰三日敗之莫倫
赤市益還泊龍灣過池州盡為雙刀所掠冬十月復
以衆來攻水陸并進公率土民與賊戰連十八日晝
夜不息又敗之懷寧縣達魯花赤伯家奴戰死安慶
商旅惟與江西為市每商船至公必置酒勞之一日
商船數百遇寇于小孤山盡為所掠公聞之即遣水
軍往救盡奪還之商人感泣十七年春二月至三月
趙雙刀與廬州兩道來攻公率土民與戰連三
五
且夜不息竟敗之秋八月寇掠八杜公遣萬戶紀
收敗走之是月公遣人至江西以漆易糧

時廣東元帥李瀾守富州公以書及弓刀遺之潤以
糧千石為助是時朝廷進公淮南左丞裁兵元帥胡
伯頴以水軍屯小孤山與公為援冬十月沔寇陳友
諒將戰艦順流東下來攻伯頴率衆與戰連四日大
潰敗軍走安慶十一月壬寅陳寇率衆數萬水陸並
進屯于山口鎮距安慶十五里癸卯寇兵至城下甲
辰公率士卒出東門與寇大戰於觀音橋是日饒州
祝寇復攻西門公分兵戰却之乙巳賊又攻東門紅
旗登城公率士卒奮力死戰賊走戊申陳祝二寇夾
攻東西二門公與諸將分兵率士卒戰愈力賊之庚
戌賊環城掘柵起戰樓礮架內向公與諸將分兵四

面禦敵晝夜不得息至十八年春正月庚子朔越四日癸卯趙寇攻其東陳寇攻其西祝寇攻其南群寇四面並至西門尤急公分諸將三門而以身當西門是為大雷門公徒走揮戈為士卒先士卒號泣止公公不聽揮戈愈力公自當一面乃分遣麾下士督三門兵至日中賊破將軍衝紅旗乘城中火起麾下數十人戰死公力盡引佩刀自剄死墮於清水塘城既破陳寇懸賞以求公屍三日得於積屍之下裸而僵臥容貌如生身被十餘創惟一足布襪存為陳寇嗟嘆曰余公元朝中臣宜禮葬之即令洗浴具衣衾

棺槨葬公西門之外公長子德臣并妻妾皆投水死次子尚幼賊舉而棄之水中家僮三人亦遇害總管韓建舉家被殺建病不能行賊執之建罵賊不輟求死甚急賊不殺以戶扇擗去不知所終時百姓壯者畢登城樓自捐其階咸曰寧戰死于此不忍降于賊也城破果然其他死者相望知名者得十八人萬戶李宗可自剄紀思敬陳彬富金三人戰死東門之帥府都事帖謨補化萬戶府經歷段玉章千戶人赤不花音理盧廷玉忽都蠻葛延齡立丞許元琰義兵百戶黃君安慶推官黃圖倫台經歷楊恒知事余子正懷寧縣尹陳秉德皆遇害此皆余諷所識者正月丙

平安慶陷二月辛巳公麾下士太湖達魚花赤那海
潛山主簿楊賽因不花桐城主簿李興潛山尉孫貴
問四人脫身至龍興言公之死如此穎又言公初為
泗州同知時蝗為災公為禱于神蝗盡死為金憲時
巡按浙江至龍游縣有二虎為民言者十數年傷人
百數公懸賞召捕二虎遂出境民得以安及守安慶
也淫僧花赤阿里賽普貪暴不法公召至廷詰之阿
里賽普一一引服明日挈家逃公判官尚某怠於供
給公杖殺之百戶一人違令斬首以徇公嘗病疽發
背不視事數日百姓憂惶咸焚香拜天願以身代公
聞之即強起上馬巡城百姓大悅寇至攻城公即擐
甲持兵率眾與賊步戰士卒擁盾蔽公公亦揮去曰
汝亦有命何恤我為廬州遣人以書來合公視其書
有偽正翔之署公哂曰是尚為賊何謂合邪吾將自
繫吾忠每有暇輒從容註易歲時朔望率諸生謁孔
子廟後而會坐講明經傳立士卒於門外使人知斯
道之尊其崇尚儒術如此故人皆知尊君親上而樂
于効死也公自讀書為名儒登科為名進士入翰林
為良太史居憲臺為名御史歷任中外咸著能較及
其死進盡力盡忠不自食言人道畢矣先是十七年
夏五月申書奏公固守一方為國保障方之巡遠尤
著全勲有旨賜公鈔五百錠以事功付史館纂修焉

嗚呼不意巡遠之諭驗于今日哀哉翰林國史院編脩各錄與權字道夫述

元史節要載

張美和臨江人

至正十八年戊戌春正月陳友諒陷安慶路守將余闕死之闕守孤城六年群盜環四外而闕獨居其中左提右挈屹為江淮一保障寇來至城下輒敗去至是友諒合諸寇來攻趙普勝軍東門祝寇軍南門友諒軍西門群盜四面蟻集外無一甲之援西門勢尤急闕自當之徒步提戈為士卒先分麾下將督二門之兵自以孤軍血戰斬首無算而闕亦被十餘創日中城陷闕引刀自剄墮清水塘中妻耶律氏及子德

臣女福童皆赴井死同時死者守臣韓建一家被害建方臥疾罵賊不屈皆執之以去不知所終闕號令明信與下同甘苦然有違令即斬以徇闕嘗病不視事將士皆額天求以身代闕聞強衣冠而去當戰矢石亂下如雨士以盾蔽之闕却之曰汝亦有命何蔽我為故人爭用命稍暇即率諸生詣郡學會講立軍士門外以聽使知尊君親上之義有古良將風烈卒年五十六事聞贈摠誠守正清忠諒節功臣榮祿大夫淮南江北等處行中書省平章政事柱國追封龜國公謚忠宣闕既死賊義之求屍塘中具棺擲塋於西門外及安慶內附

大明皇帝嘉闕之忠詔立廟於忠節坊命有司歲時致祭焉

余左丞傳

余闕字廷心一字天心唐元氏世居威武父沙刺臧卜官合肥遂為合肥人母尹氏夢異人至生闕闕生髮盡白嗜欲淡甚不知有肉味惟甘六藝學若飴蜜歲環攻之與京兆張亨游亨臨川吳澄弟子善談文理闕之學因絕出擢元統癸酉進士第授同知泗州事泗州頽隳民豪弗馴官稍箱之多以誣去闕繩尤無良者數千帖帖不諱泗無麥民以乏故事不敢聞闕上之中書言定為令凡無麥者得減賦代還長老爭進

金為壽闕謝去後闕往桐城道逢故民皆羅拜馬首相隨弗忍離信宿而別俄召入應奉翰林文字轉中書刑部主事三月之間疏滌冤滯獄五百上官忌其才議寢不合闕上宰相書言狀又不報拂衣竟歸居無何復召脩遼宋金三史拜監察御史上疏言守令最近民欲萬國治責守令反是政麗宜用殿最法力行之便上從之藩王府諸校白晝殺人金道上勢如狼闕遣卒捕之上思治切議遣巡察郡國闕言向奉使無狀所至處食飲供張如事至尊曾不能宣上憂恤元元之意宜亟罷之不聽後闕補外會奉使者亦至執闕臂曰誠如君言闕忠亮不加怨闕在位知無

不言言峭直無忌人勸闕少辟禍闕曰吾縱情豈不知犯龍鱗為危委身事君身雖殺弗悔也改中書禮部員外郎闕議復古禮樂其言精鑿有徵聞者斥為迂闊弗用安西郭氏女受聘未行會夫卒郭為行服終身不嫁有司請旌其門闕以過於中庸不可以訓檄不下出為湖廣行省左右司郎中廣西多峻山負粟輸官者厄於道險費恒倍闕命以布帛代輸右丞沙班怙權自用多錄其私人闕輒抗詞沮之會有徭蠻反當帥帥又止不行無敢讓之者闕揚言於廷曰右丞受天子命為方獄重臣不思執弓劍討虜乃欲自逸耶右丞當往沙班曰郎中語固是如芻餉不足

何闕曰右丞第往此不難致也闕下令趣之三日皆集右丞行湖南章宣慰以婆律香贊闕覺重亂之香中果貽黃金章歎曰余贊遠官無弗受絮如冰壺者唯余公一人耳後以集賢經歷召入預脩本廟后妃功臣傳遷翰林待制出食浙東廉訪司事發奸擿伏聰察若神州縣聞闕至貪墨吏多解印綬去發定賦無藝役小夫各違度闕遊官履畝實之徭賦平徭士無養以沒入田分隸學官郎長燕只告台肆毒殘衢民闕鞠治之獄上行御史臺臺臣與有連及以事劾闕闕歸隱青陽山丁尹氏憂闕性至孝嘗夜號慟不絕聞者至洒泣至正壬辰天下兵動平章致事脫

忽爾不花統戎淮南承制起闕權淮西宣慰副使國
對使者曰為臣死忠正在今日闕何敢辭即之官分
治安慶安慶距城皆盜柵也闕從間道入推赤心置
人腹中復轉粟以哺餓夫民翕然歸四方求依者日
衆闕知民可用乃帥之破雙港峇關被甲荷戟直前
賊空峒出關殺傷相當至日吳賊殊死戰闕不勝退
復收散卒誓曰死則死此爾何生為一鼓而進大破
之諸峇畏威次第降闕益繕城浚濠脩矛戈分屯耕
郊外田民惧不能者遣軍士護之耕賊來輒與戰一
日賊四合旌旗蔽野鼓噪之聲震天地闕縱鳥騎數
十人喊而出賊勢披靡遺棄棄之斬首數千級當是

時淮東西皆陷唯安慶巋然獨存賊來戰又數敗却
之偽作尺牘通城中諸大姓約期日友與闕捕戮之
闕曰我民安有是命悉焚之賊計窮復令闕故人以
甘言說降闕命牽出以鐵錐擊碎齒頰斬于東門潛
山有虎傷人闕造文檄山神使驅虎虎出境不傷人
功上朝廷俾為真陞同知淮西宣慰副使都元帥賜
以上尊及黃金束帶江西諸官軍動踴數萬掠玉帛
殺嬰兒置戟上為戲松江州郡患苦之獨不收近城
下即近出師擣退之咸服其義至有來降愿充將校
者溪洞貓獠兵屯潯陽命使者率百輩腰刀直入背
闕使供億闕叱左右收縛付獄且上疏言貓獠素不

被王化其人與禽獸等不宜使入中國他日為福將
不細後竟如其言轉淮南行省參知政事尋改左丞
賜二品服闋益自奮誓以死報國立旌忠祠以厲將
佐時集祠下大啟謂曰男兒生則為帝孝寃死則為
張巡許遠不可為不義屈意氣慷慨甚丁酉冬寇大
集諸部圍城戰艦萬江而下樵餉路絕兵出數失利
戊戌正月七日城陷闕猶率眾巷戰賊呼曰余將軍
何在吾將官之闕手戟罵曰余恨不得嚼碎汝肉吐
餒烏鳶寧復受汝官耶賊怒舉長鎗欲刺闕闕遂自
劉沉水死年五十六其妻耶律氏聞之亦率其子德
臣女福童赴水死諸將卒慟曰余將軍不負國我等
何負余將軍耶從而死者十餘人朝廷知其忠贈闕
淮南行省平章謚曰文忠公闕為人剛簡有智無職
不宜為為即有赫赫名所至薦賢旌孝義惟恐後每
解政閉門授徒蕭然如寒士五經悉為之傳註多新
意詩文篆隸皆精緻可傳贊曰於戲闕其人豪也哉
獨守孤城逾六年小大二百餘戰必勝其所用者
不過民間兵數千初非有熊虎千萬之師直激之以
忠義故甘心效死而不可奪也後雖不幸糧絕城陷
以死而其中忠精之氣炯炯上貫霄漢必祭為列星流
為風霆散為卿雲凝為瑞露闕雖死而其不死者固
自若也然而闕死於君而能使妻死於夫子死於父

忠孝貞節萃於一門較之晉又壺關又似過之美於
戲關果人豪也哉余來江左見其門生故吏言關事
多至泣下者因想見戰守處江流有聲而斷雲落日
凄迷於莽蒼間猶足以動人悲思因撫其行事成傳
以示為人臣者

金華宋濂景濂撰

死節記

有元設科取士中外文武著功社稷之臣歷歷可記
至正辛卯兵起淮瀕城盡廢江漢之間能扞禦大郡
全畫名節者守舒帥余公廷心一人而已公家世河
西自擢高科登要職以浙東僉憲來鎮舒郡始至舒
時國門之外數十里之地皆盜柵也公身率壯士累

戰而勝盜遂退乃為攘剔傍近之地令民耕之大築
城壘脩矛戟募勇士以備克復癸巳秋國朝命太師
右丞相脫脫征討江漢使至舒公即奉命率兵卒出
境戰潰群寇遂平樅陽盜柵維時湖廣陳友諒據上
流趙雙刀據池陽公常具戰艦數百艘借糶江西往
來皆為二兵邀遮然與戰無不克捷或誘至城下而
設竒俘獲尤多盜為股慄舒屬六邑皆為盜所據民
有逃亡至郡者之絕糧饋公捐祿米二百石以賑恤
民乃安凡盜至民亦為力戰時子自閩海還舒謁公
於館下公延子門塾俾教授子弟翼日侍公於城之
南樓語及國家願謂子曰余荷國恩以進士及第歷

省憲屈館閣每愧無報今國家多難授予以兵戎重
寄豈予所堪然古人有言為子死孝為臣死忠萬一
不幸吾知盡吾忠而已丁酉冬十月上流陳寇至郡
城圍及兩月公累出奇兵以戰陳寇至者甚衆其屬
邑逃難之民悉思効義以報且戰且守寇兵遂弱城
柵益堅盜思不能獨勝乃會趙雙刀水軍上下來攻
戰艦萬艘擊鼓震動砲石砰礮公益厲將士民亦無
惧色十一月趙寇急攻城南門陳寇攻城東門戰數
十合士氣頗急公駐甲於城東之練對灣二寇挑戈
凌濠來戰公持刃躬自殺之俱墮死於濠池一賊又
復登岬公復奮兵刺殺之陳寇望嘆曰詩書之帥必

如是夫使天下皆余公也何患城守之不固哉有頃
諸將復集皆愧私相語曰元帥躬自奮勇吾生何為
皆踴躍思戰陳寇見兵勢復盛遂皆退十二月趙寇
復攻城東公誓將士曰今城守孤危汝等當為國宣
力有功者當以吾爵授汝不然則戮以徇將士受命
亦皆以死自誓血戰至暮兵稍不利公被矢傷及左
目神思昏惑將士遂衛公還暨至關內甍而驚愕謂
左右曰全忠報國吾分內事耳使吾得死其地吾瞑
目無憾汝奚以我歸耶於是將士復衛公出戌戌春
正月盜整兵大合舳艫延亘旗幟燄燄公率將士及
城居之民戰於城西門力敵至午城遂陷公拔劍自

刎隨濠西清水塘而死陳氏以金購求得之具棺擲
衣衾葬於城外公之夫人蔣氏聞公仗節即率女安
安竟赴井死長子名德臣時年十八能熟記諸經書
慟曰吾父死於忠吾何以生為乃溺死於後園之深
池甥名福童善戰有勇力亦戰死於城濠之間姪婿
花李為義兵萬戶自城外馳單騎回其家人勸之降
李怒曰吾受元帥節制平日甘苦元帥與吾共之元
帥已死吾降異日何以見元帥於地下且曰尔等亦
當隨吾盡忠毋為人所魚肉乃盡驅之一室無大小
咸殛殺之然後坐取巨觥以飲拔刀自刎而死賊衆
入見斷其首而去其餘將士若萬戶紀守中金勝宗

鎮撫陳彬千戶那海經歷段玉等俱不肯降或戰死
於鋒鏑之下噫自古天下有盛必有衰然以予觀之
三代而下漢唐及宋未有如元運之盛者奈何承平
日久武備不脩一旦兵起淮漢為臣子者或擁兵自
衛或望風而降如是中原失守而忠臣義士幾何人
斯稽之史冊自古忠烈烜赫者惟唐巡遠宋文天祥
而已若吾余公廷心鍾光岳之靈氣有文武之全材
方氣運之盛黼黻大猷煥然可述當多難之秋戰守
之功鮮有僮者及夫援絕城陷竟能秉節不屈視死
如歸尤人之所不及先民有云疾風知勁草板蕩識
忠臣其此之謂歟然公之忠節固職之所當為而公

之夫人若子若女一門之節義又世之所無者予素居公之館下凡公之政蹟不及枚舉而公之大節敢不紀之以傳諸後故為之記仍贊曰於赫元運篤生名臣識綜今古學究天人扞此大邦戎備整飭允文允武克著厥蹟古有述遠公實邁之猗歟忠節敢揚頌詩至正戊戌太原賈良伯為記

近考余忠宣公夫人死節姓氏大史宋先生傳書耶卜氏元史節要載耶律氏死節記作夫人蔣氏書記不一莫得其的僕因細詢先生姪孫宗烈云叔祖父有妾耶律耶卜氏叔祖母夫人實將氏子德臣年十八女安女年十四皆其所

生故常服膺則知向者所書皆妾姓氏也恐泯其嫡之貞節遂書之記末以示久遠

維揚張毅識

賀丞相答書

賀太平書復廷心左丞執事使來承書忻慰無量方四方多事安慶孤城內無贏餘之糧外有強悍之寇守禦六年屹然獨保於江淮之表方且開拓封疆安輯流亡敬教勸學罰罪賞功惟執事能之承平之久妖人小夫扇為邪說群起為盜向之委任失宜賞罰不當執事此論為得而逃然既往者不可追未來者安可不熟思而精議哉自方面大臣銜命四方或要

求爵賞或暴虐黎庶或猜忌同列或貪黷貨色使冤
冤塞路奸宄窺伺城邑陷沒田萊荒蕪嗟乎何其一
至此極也執事施諸事功固亦鑿鑿精實如此行將
著之旂常勒之金石震耀後世而垂無窮由其人而
觀之誠可愧已天朝設進士科網羅賢俊得人才如
執事者亦可謂不負國家矣主上明燭四海安慶之
事簡在宸衷故賞擢至公所請皆允亦所以勸獎忠
義削平寇難以固萬世無疆之基惟執事尚懋敬之
無患乎朝廷之不知也人還匆匆復書不次

七言絕句

劉伯溫

誠意伯

皖口孤城江水傍城上猶有秋雲黃豺狼麴魅相食
盡忠魂白日長垂光

王諫

漢川人御史

江山滿目使人愁不見孤軍鼠鬪秋皖口鼎沙今幾
變英雄淚洒水東流

長江東下皖城邊雲淨烟消日色鮮一派安流人競
渡不知昨日浪滔天

劉昱

衡陽東湖人

當年不負胡王養今日尤來
聖主東來也解天人歸正統為臣爭柰死忠高
糧絕兵疲數上書宰臣不報意何如甘心自刎烟霞

重萬古昭昭播令譽

張璠 羅山人訓道

一朝得上感恩亭望斷江南幾闌青千古忠名元不
私江流應自瀉東情

五言律詩

沈永 大年淮南人

百戰全生易孤城効死難援兵斷消息敵國恣兇殘
淮甸烽烟熄舒城戰骨寒後人應過此好為拭碑看

徐壽 大同吳東委江人

保障孤城日群兵四面攻七年持大節一死樂全忠
血劍英靈耿居民老淚窮有詩難盡述青史著高風

鄒緝 仲熊廬陵人侍講

國運艱難日孤城獨守時江淮資保障歲月極支持
苦戰身方殞臨危氣不衰千秋精爽在凜烈有遺祠

又

上書三不報志節愈難窮力盡兵猶閉城存堞已空
碧苔荒舊跡白日耿孤忠名與睢陽並千年汗簡中

伯顏 子中元兵部尚書

義重身先死城存力已窮百年深雨露一士獨英雄
甲第叢華舊文章節槩中只今千種恨遺廟夕陽紅

徐誼 徽州人吉安知府

舒州老全節全死勝全前天地有遺恨朝廷無援兵

七年經百戰千里只孤城縱使龍山碎難磨萬古名

楊茂

鎮守淮安清遠參將

先生遭國難竭力守孤城禦敵陳奇策因奸阻援兵
琴民天共火大節日同明千載期張許英魂死若生

余順

岳陽人吉安知縣

讀書青陽山獻策黃金殿保障值江淮間關守畿甸
孤忠天地知大節華夷見埋玉皖江濱經遊動悲言

七言律詩

張桓子

永豐人

抗節前朝賢左轄扶持邦國仗奇才七年手止江淮
滿園宅身賦父老東青史不磨遺恨在寒潮空打故

城回如今只有超然塔曾見將軍百戰來

林文啓

三山人

兜鍪誰謂出貂蟬遺像丹青尚儼然名節若隨身後
死文章那得世間傳潛岳有山朝北極舒江無水達
幽燕皖公門外青青柳猶與先生躍馬還

漁樵翁

古番人

青陽夫子聲名著保障江淮計出奇一寸丹心人共
識七年血戰世間知可憐丞相終無援慟哭將軍遂
不支遙想九原無限恨英雄到此倍傷悲

張豹

上饒人

大帥忠貞身與儔雄名耿耿冠舒州力持虎節凌霜

雪神逐龍光射斗牛白骨一亟歲夜整丹名千古湛
江流于今祀典垂元史姦佞偷生事可羞

張紳士行齊郡人浙江布政使

余公廷心少學於紳外舅江西提舉益明楊先
生登癸酉第紳會試時公與公平李先生同為
考官兵亂守安慶陳友諒趙普勝夾攻之外援
久不至公以忠義導民民為之死守將士亦殊
死戰城破至有全家至屠者至正戊戌正月七
日城不守引劔自刎贈祭祿大夫淮南行省平
章追封夏國公謚忠愍改贈幽國公謚忠宣
一虜分疆噬虎狼孤城屹立在中央民知義重從公

死士為恩深罵賊亡大史已聞書德業門生還與刻
文章龍媒僵仆兵車道國事如斯亦可傷

胡儼若思豫章人國子祭酒

舒州城下有忠魂碧草淒淒古廟存直欲起兵呼夜
雨豈誇橫槊動秋雲曾看數對三千字已識英雄八
卦門清水塘中金鎖甲空留山月照黃昏

黃業廣

清源人知縣

大夫忠節冠荆揚千載精神日月光血戰孤城身已
殞名垂青簡汗猶香殘碑墮淚空秋草折戟沉沙自
夕陽我亦有懷追國士為君感激奠椒漿

朱克昌

臨川人

天下紛紛比獨安
屹如砥柱障狂瀾
十年血戰身無
援一旦唇亡齒亦寒
妻子滿門皆烈烈
偏裨終古共
桓桓史臣直筆
旌忠節長使姦諛
掩面看

李璣

天長歌論

忠義祠前晚繫舟
為詢往事不勝愁
江城夜雨樓戈
甲帝闕妖氛蔽冕旒
泣血封章三奏日
焦蘇羅雀七
經秋匡扶全仗身
先死過客傷心淚
暗流

許時悅

古番人

信知忠義肯捐生
運去難將一死爭
九陞雲深書不
到三軍食盡鼓無聲
青陽千載山房重
白髮平生嗜
飲輕今古英雄能
幾見相陽雙廟可
齊名

吳瓊

一門三節動當今
况復偏裨力足任
卞壘有兒常配
食田橫無客不同心
經傳漢獄情何極
哭向秦庭路
莫尋惆悵真儒淪
沒後皖城萬古一
銷沉

劉丞直

宗廟重貴人

指揮戎馬駐江濱
南紀安危寄一身
闔室同歸追李
芾孤城百戰繼張
巡河山莫誓歎庸
盛金石徒傳翰
墨新漂泊風塵恨
何以空餘涕淚滿
衣巾

董真

中州金華

荒池斜日暝雲陰
獨立空山淚滿襟
遺老能言當日
事寒蟾猶照此時
心百年妻子憐魚
腹一代山河看

陸沉故園春風又芳草祇應遺恨九原深

王冕 立端 長沙人 府學訓導

赤燄南來擁萬舟丹心北望獨悠悠
關東竟起運秦虞即畢徒煩縱火牛
萬里一城三百敵孤城百戰七
經秋空遺世代無窮恨不盡長江滾滾流

克章

古詩 同人

許國捐軀世所奇斯人堪與古人期
七年戮力無間日千古英名在死時
白髮祇應憂國變丹心惟有老天知
皖公門外清清水都是行人墮淚池

韓守

仲修 江陵人 李府通判

危城高峙大江坡偽漢軍來絳幘多
孤忠不變死綏

節百戰猶揮挽日戈亦有偷生忘社稷
豈無垂涕泣

山河賴公大義扶名教炯炯精靈不泯磨

吳伯宗

臨川人 翰林學士

四郊圍合偃旌旗百雉孤城遂不支
空有張雷全節地竟無周漢中興時
寒烟逝水留遺跡落日長松想令儀
生死實關倫紀重簡編千古大名垂

甘瑾 彥初

大將分符自朔庭出師江漢肅南征
賀蘭不救睢陽死無忌難收晉鄙兵
唇齒百年誰復惜簡書千里謾多情
西風一劔英雄淚已逢寒江日夜教

揚善

天台人

大夫持節扞潢池仗劍捐生答誓塵漢幟七年兵氣
盛楚歌三月燧烟隳息埋荒草桐鄉墓淚墮西風現
隴碑我向江城酌明月角鼓寒送落潮悲

龍仲高 廬陵人始興訓導

憶昔環城盡賊鋒君侯戰守奮孤忠藩維社稷幽燕
地峙立江淮泰華峰四劄枉勞馳闕下一星俄覩墮
營中傷心清水塘中浪猶帶當年戰血紅

項外 城中潛山主簿

七年勵志抵兵戈食盡城危可柰何循節捐驅家已
滅感恩酬死士應多寒原古塚荒秋草清水空塘澹
夕波

聖代嘉忠崇廟祀巍巍功業等山河

朱佑 靜玄本府道紀

將分茅土鎮舒州七載空城一石休長劍倚天閒歲
月孤墳接地老春秋水流鴈漢一行淡雲抱龍山萬
斛愁躍馬西郊曾吊望夕陽芳草思悠悠

蕭靜 廬陵人 洲衛經歷

功業堂堂有幾人大夫忠節獨超群一身許國能報
國萬死求仁已得仁夜月魚祠飛蝙蝠秋風高塚臥
麒麟至今彷彿遺靈爽鐵戟沉沙起戰塵

張致遠 古壇人前元遺老號江海先生

將星殘夜落前軍鐵馬金戈去不存躡履西郊尋故

墨采蘋南澗黃忠竟高風不獨傳千古死事何緣萃
一門獨倚白揚空悵恨烏啼落日滿江村

危興

士起於南人懷寧訓導

七載江淮總義師將軍端繫國安危仰天長劔酬恩
日漂杵孤城戰賊時盡節張巡還有將全忠下壺豈
無兒後來欲覽當年事細讀祠前太史碑

曹璉

大用潮邑人懷寧知縣

康走中原勢欲傾獨持黃鉞奮忠誠今申江右三軍
棋名動淮南一虎爭戎幕荒涼叔將印士林顛領泣
書生一門骨肉數丘土池水吹波恨未平

童賢愈

澄溪人本府推官

人生一死古誰無張許睚陽與大夫白日未消忠節
恨黃金難鑄鬪骸枯山河日落鳴孤鴈社稷烟寒叫
老烏廟祀封崇遺像在高風千載見真儒

高永善

維陽人

記得當年受詔行轅門攬轡欲澄清已傾心膽酬君
父又見文章化甲兵事去力窮惟有死功成豈遂豈
虛生九原不朽英雄骨塚上龍光夜夜橫

鉄處義

紹興人者山知縣

數名曾向棘闈開三策從容濟世才戰血未乾龍北
去妖氛初靜鳳南來愁聞父老當時事恐聽江流此
日哀遲暮艤舟吊祠下一尊聊奠後人懷

姚孟 字景天台人江夏訓導

父矣風塵滿四方纔開分闔鎮舒邦紅爐片雪書徒
急尺土孤軍勢莫強盜賊固聞千古有英雄誰似一
家亡堂堂廟食應無忝淚洒西風只自傷

馬壽 修齡吳興人府學訓導

藩屏江淮一偉人馬蹄曾踏杏園春材名卓犖兼文
武智節超騰邁等倫蘇峻豈能汚卞壺賀蘭終莫援
張巡忠邪瞬息俱淪沒予奪分明有縉紳

張遯 宜中臨川人谷府長史

大將才名重若山匡時怒氣激江湍五千疲卒六年
守百戰孤城一死安古皖有碑題姓字青陽無地葬

衣冠古來惟有張巡傳却與先生可並看

嚴律已 涪江人本府同知

幾度臨戎撫大阿要清宗社挽天河乾坤未老英雄
志淮海俄驚殪露歌三節清名垂竹帛一杯黃壤護
烟蘿空塔滴盡秋宵雨不及舒人洒淚多

胡尊 尚德本府人太學士

七年不解鉄衣眠勢盡城危肯負天妻子共埋幽壤
地偏禪不上別人船經時計出孫吳右塵戰身當士
卒先神鼎欲移元祚去英雄遺恨漫悄悄

張毅 仲剛維揚人

舒江江上艤輕舸白髮懷賢幾度撥清池塘深龍有

穴碧松枝折鳳無巢雲移殺氣歸秋昊月照忠魂落
楚臯惟有鼎鍾銘刻在萬年寰宇頌英豪

黎霄之克輝臨江人

逐鹿紛紛起戰塵干戈流血禍斯民一門全節萬年
史千里孤城百戰身殺賊猶當為厲鬼忠臣無愧作
元臣寒鴉古木荒祠晚過客題詩薦渚蘋

王魯景沂天台人號東溪漁子

自誓捐驅必竭忠歷年淮海苦摧鋒無人射戟銷兵
難有史褒功勒鼎鍾戟骨捐時臣事畢愁雲凝處夜
臺封步趨故壘追傷父不覓沾衣淚雨重

錢用時雲間人

一從閭闔剖兵符叱咤風雲啓壯圖氛祲未全消
野將星俄已墜城郭同刊客過襟常濕塚上鶻啼血
未枯不盡江流牽杜恨千秋萬古益嗚咽

鄒濟汝舟嘉禾人左春坊右庶子

潛岳俄催天柱峯皖城此日喪元戎祇令節義傳千
古不使功勳遠九重李黼精忠堪與比張巡血戰亦
相同至今惟有同安月照元靈祠氣吐虹

翁諭惟謝本府人

江城曉霽散晴嵐覽古憑高客淚衝原野已空雲鳥
陣江流還送夕陽帆檢閱大帥忠元國更覩何人舉
傳岩神爽在天知不昧晴將池滿三危夢

汪儉克倫本村人

七年禦海戰，奮邦力盡，城危豈受降。四海幾人心，不二一門全。節世無雙，勳庸未遂。標銅柱，社稷先鶻折。玉幢我悼英魂，三酌罷滿船。載恨下蒼江。

釋非空幻東瓊

落日殘霞照皖城，青陽劍血亂晶瑩。英雄在世誰無死，臣子能忠鬼有靈。一代謀臣無上策，千金戰士困邊廷。江南大史南歸日，白首愁看汗簡青。

鄧玉

弇山人

江雲澹澹，江水清。吊古獨上舒州城。青陽先生不可見，群玉山人空復情。一門骨肉死貞節，千古文章留

姓名。高風激烈誰能比，李希守得當並稱。

釋惠恕守拙四明人

南北音書杳莫通，先生猶自理春農。四方群起兵無援，七載孤持力已窮。江上洪濤張怒氣，城頭古木動悲風。不因廟食旌忠節，誰勒功名上景鍾。

劉復性初淮安同知

闕下上書三不報，忠誠如鉄竟難磨。一門共守彝倫死，萬古爭傳大節多。祠廟有靈依宿草，江淮無障付頽波。祇今夜雨舒城外，猶見將軍荷戟戈。

周孟簡

廬陵人編修

千載名高宇宙間，一門忠節古今難。長淮月暗潮聲

晚清水塘深夜色寒遺廟也應行客拜舊碑還與後
人看傷心回首同安路故壘荒荒浩照殘

李禎昌 樞廬陵人 禮部郎中

天遣江淮保障傾孤軍百戰守孤城包胥激烈空岳
淚子路從容自結纓炳炳大名昭不朽堂堂遺像凜
如生寒烟蔓草平原上風雨黃昏燐火明

劉翼南

沛郡人 臨江知府

荆楚黃塵一丈深孤城百戰力難禁忠存已化長弘
血運去寧移許遠心落日斷雲秋色淡長江流水夜
鼓沉空餘遺恨千年骨哀此新投淚滿襟

陳文石

德文南 泗水人 御史

凜然忠節播鴻音百戰孤城歷歲深狡賊有兵藏九
地援書無意惜千兵萋萋碧草長弘血杲杲秋陽國
士心直筆謾勞諸太史輝輝文彩粲儒林

吳均

仲平 臨川人 右春坊右中允

孤城百雉鬱嵯峨此日重持使節過國士有祠存大
節中流無柱障頽波愁看落日依軍壘忍聽悲風激
劔歌擬掬寒泉薦藉藻細將遺刻重摩挲

元釋法智

浮圖高出暮雲低雉堞連陰碧樹齊茅屋人家兵火
後樓船鼙鼓夕陽西大江千里水東去明月一天烏
夜啼欲醉忠魂荒塚外白楊秋色轉淒迷

吳去疾

本府人河東益運使

孤軍百戰六年強救援終無一騎將鼙鼓殼沉天地
老龍光血漬旄倪傷荒原風雨摧殘壘斷碣莓苔臥
夕陽白髮門生薦藉藻一殼哀些夢淚沾裳

烏斯道

繼善四明人永新知縣

江淮父老頌余佚元世忠君第一流九里孤城雄砥
柱萬言長策煥皇猷從容自了人臣義感慨誰分帝
室憂直筆董狐公論在大書不減賀蘭羞

劉辰

伯靜金華人北京刑部侍郎

文武全才足智謀一毫慨慷鎮舒州可憐大海揚塵
日正是孤城報國秋三尺龍光全盛節千年砥柱屹

中流不知負義偷生者曾有承嘗廟食不

趙毅

孟弘汝南人工部侍郎

不為國老養東膠罷振兵鋒殄寇巢靈爽有憑歸碧
落神駒無繼產蒲稍可憐唇齒爭三輔不帥貌猶出
二嶽拊髀幾迴傷往事遐心如刺淚如拋

刑旭

景陽金華人工部員外郎

龍舒江上悼忠魂曾挽天河靜楚氛戰地幾消漂杵
血鼎銘常溢濟時勲自甘取義垂千古誰復沉舟奮
六軍慨想高風揮淚久哀猿轂裏落寒燠

沈雨

收雨雲間人府學訓導

闔室忠貞萬古稀毅光烈烈更輝輝有身為訓彛倫

重無力回天國祚微仇敵懸金封馬鬣承黎揮淚濕
鵝衣江城霜重秋風勁似振當年剪寇威

端木孝思金陵人兵部員外郎

早登西北文章府晚領東南第一州舉目豈堪塵世
變攄忠不盡大江流星沉絕塞烽烟暝月冷滄波劍
氣浮自是龍舒天柱折白雲夢斷日邊遊

任倫本府人御史

鉄馬金符老制科孤城援絕柰時何雙蓮塔頌擎天
柱八卦門摧挽日戈虞舜躬膺克曆數孔明忠在漢
山河偷降誤國空林總誰似先生死不磨

管時敏雲間人楚府長史

元戎百戰守孤城千里虬蟬絕援兵保障有方文且
武簡編無愧死猶主神來遺廟乘雲氣鬼哭空江雉
雨聲尚憶李侯拜達帥一時忠義屬科名遺無善狀

元帥死于海李于成狀
元為泗州太守死于郡

張毅

分符千里障江淮欲濟蒼生節已排膽壯尚謀攘賊
計兵羸無力抗時乖七年城毀功難毀孤塚身埋志
不埋自是天移元祚去見公能事令人懷

燕國誠臣磬室家孤城無復見高牙奉羅荒塚連秋
月殘血方塘浸暮霞關陝惟圖讐言接計朝廷空下
肅清寐傾心自盡酬君義千古忠貞愧後邪

李實

古渝人禮科給事中

且耕且守六年餘保障同安志不移百戰一門甘死
日孤城四面受攻時王師絕援風塵起軍餉無輸國
步危清水塘中千古月寒光常伴哲人祠

陳泰

武陽人副都御史

先生元季老儒臣武烈文謨事事新七載孤忠寧殉
國一門全節竟捐身喜城卞壺誰云過睢水張巡孰
與倫惆悵英雄千載後日華虹彩二三人

王驥

榮昌人御史

孤城戰守六年多援絕儲空奈若何甘率妻孥全死
計肯富貴逐類波一門大節通天地千古高風播

詠歌駐馬祠前傷往事不禁雙淚欲成河

葉瓊

四明人本府知府

海外塵昏列郡危奮身獨出武侯師可憐大節名成
日正是孤城死關時元運已移功莫就捷書不報力
難支龍舒萬古留遺恨拭淚來看太史碑

方鼎

府學訓導

叨承恩命教舒摩再拜忠宣重感傷百世文章凌日
月萬年祠象凜風霜英雄誰浹浩長江水忠烈名垂大
節堂幸遇

聖朝崇祀典幾嗒侯牧奉蒸嘗

康弘敬

壽和人府學訓導

群雄蠡起寇孤城賴有先生統義兵仗節七年寧遼
死輸忠闔室竟捐生荒丘不朽英雄骨史傳難磨慨
慷名我忝龍舒淹薄宦一迴陪祀一傷情

祖暉

都經

七載孤城一旦傾奮身獨戰勢崢嶸雲封虎帳精光
壯月照龍山怒氣橫忠節一門無玷缺褒封千古有
光榮幾回吊謁西郊外淚洒東風恨不平

劉泰

嘉興人御史

我孤金盡勢如傾報國身同捨介輕妻子一門甘義
死偏裨數輩不偷生出雲時吐英雄氣江漲疑聞戰
鼓哀子千古忠魂應不滅年年精衛討頭鳴

張湜

四明人建昌教諭

地老天荒業已空孤城戰守見英雄一門自盡生前
節萬世爭傳死後忠石馬馳殘秋月白庭烏啼斷夕
陽紅我來瞻拜思遺德清淚無端落晚風

周翔

四明人本府知府

戰守舒城志未酬糧空援絕計無由妻孥盡赴滄浪
去勲業都從汗簡收耿耿孤忠昭日月煌煌大節重
山丘先生已遠英魂在野草開花總是愁

李楫

廬陵人

海宇風塵國步艱先生伏鉞鎮同安憂時髮變千莖
白報國心存一寸丹七載千城文武備全家忠節古

今難旌忠有廟春秋祀青史留名後世看

黃諫

金城人翰林學士

手持一柱障南天死守孤城志益堅歎息晨尸惟馬
章從容就義仗龍泉旌忠已受朝廷典崇化充誇守
令賢細訪遺踪在何許大雷門外水塘邊

李貴

菊潭人本府同知

國危城陷力難撐一死能存萬古名從卒捐軀知義
重舉家赴溺視生輕烟迷荒隴埋英氣浪激長江帶
恨嚴羞殺當時曾誤國泉臺何面見先生

宋瓊

漢陽人本府推官

幾年血戰守危城軍卒糧空絕援兵將卒盡忠甘效

死妻孥全節不偷生荒祠木落秋風慘孤塚猿啼夜
月明拭盡古今多少淚茫茫碧落恨難平

王諫

漢川人御史

及第才名著鉄衣兼資文武古今稀
朝廷不報襄陽請張鎬尤奔許遠圍朝歷江流無盡
恨忠摩天日有餘輝功勛幸遇
皇明表大節從來矢不違

彭彥克

安城人禮部主事

舟泊舒城幾國祠義聲凜凜動吾思孤城萬姓生全
日七載三軍死戰時羞見山河紛割據欲扶天地正
縈維水流嗚咽啼鴈切彷彿猶含壯士悲

宋鉉

東吳人神史

文武材全德望優古今四海幾人伴孤忠不負君臣
義獨戰能分社稷憂死節一門昭信史精靈千載顯
舒州我來拜奠松楸下風物傷心淚漫流

耿熙

本府人饒州教授

遙憶當年賊寇侵城圍援絕力難禁半生不改冰霜
節一死猶存鉄石心元史有文書茂績祠堂無主鎖
秋陰滿門骨肉知何在留得芳名冠古今

吳節

安城人祭酒

六年保境得人和世亂那知寇盜多援絕孤城無白
鴈手揮落日有金戈果卿不負常山郡屈子甘投楚

水波

聖代旌忠存廟祀一杯黃土吼山河

尹直

泰和人

皖城西畔大江濤勝國忠臣瘞玉深碧草黃鶴春寂
寞淡烟疎樹氣蕭森君臣獨盡生平義妻子同甘死
節心太史有文昭萬古凜然英烈使人欽

郭鐘

息邑人金都御史

國步艱難不可為孤軍猶自把旌旗生能保障功非
易死有衣冠事亦奇骨肉竟無虧大節經書真是有
微辭至今清水塘邊路風景常令壯士悲

鄭存德

南康人刑部主事

百戰江干萬骨枯
氣吞逆賊皖城孤
圍門許國義云
爾群下同心忠
矣乎大厦既傾
應力竭經常不
墜是
誰扶

皇明祀典今崇重
千古羈臣有楷模

李孟暘 中州人戶科都給事中

堂扁親題大節名
知公大節窮分
明天魔後死友
成舞赤子潢池
父弄兵精衛有
誠填海涸女媧
無力補天傾皖
城城下秋風吼
疑是當年戰鬪
聲

顧福

吳下人吉安知府

西風占地滿苔痕
長日松蘿掩石門
歷歷江山存義
氣茫茫天地渺
英魂一家甘分
男兒死百戰曾
酬主

上思黃土可憐埋
碧血水光山色
自黃昏

劉憲

餘干人奉政

宸極星殫不忍聞
先生底事劄奇勳
君臣本繫縈常
重夷夏何曾彼此
分千古文章流
海宇百年忠義
薄天雲高山仰
止非今日再拜
真香一瓣焚

崔廷圭

南史

文武全才大丈夫
江淮保障展良
苗疾風勁草威
嚴烈砥柱中流
志節孤妻子成
仁甘共死旄倪
感德重嗟吁旌
忠廟祀留千古
真氣時看燭太
虛

嚴方

華江人贈尚書少卿

獨守孤城志不移
要將一木柱顛危
淒涼鼓角兵威

壯迢遞關山羽檄遲父子共成忠孝節軍民同困亂
離時長江滾滾流餘血萬古千秋不盡悲

李贊

蕪湖人吏部員外

龍舒城下英雄墓我肅衣冠拜墓前白石有書旌大
節青山無口說當年可堪丞相連書上哀苦將軍帶
甲眠萬古尊崇公一死今朝不必為公憐

徐傑

雲中人本府知府

地折天崩赤手扶嬰城百戰扼江湖志存宗社捐軀
命欲剪群奸潤鼎缺名與皖山相上下血沉清水不
模糊追思前史如公者下壺張巡與丈夫

畢大經

東莞人同知

盡日黃堂無俗諠景忠樓上吊忠魂文才武畧英雄
喪烈日秋霜節義存遠郭牙樞如畫戟覆堤楊柳類
軍門我來空自傷懷抱楓落江干日又昏

董璘

仁和人通判

清水塘中事已荒獨留青塚臥斜陽投江屈子應無
愧罵賊張巡信有光百戰勲勞雖不竟千年廟祀亦
何長幾回吊古高樓上一度臨風一慘傷

張訓

衛南人推官

分符到此值兵荒葵藿傾城只太陽大節與天同不
朽精忠和日共爭先水沉浩氣丹心壯雲鎖孤墳白
晝長我亦從來慕公義古碑讀罷倍堪傷

楊浩

滇南人懷寧知縣

幸苦遭逢起寇兵乾坤誰不說偷生五甲無復軍中
今百戰應留死後名耿耿真心輝汗簡陰陰封爵
佳城祇憐未捷星先殞長使英雄恨不平

屠珙

四明人府學教授

出守江淮際亂時孤軍無援可相支運籌計欲全茲
土決勝天何喪我師死難忠誠昭日月輕生節義及
妻兒幾經清水塘邊過尤憶當年事慘悲

秦煜

四明人府學訓導

先生早見大明宮不死舒城百戰中肯學仲由忠衛
國便為管仲相桓公一時北狄祛腥氣千古中華復

正風昨過廣潮山塚下江聲猶帶恨無窮

汪紳

番陽人懷寧訓導

祠堂滿壁墨題痕愁覓旌旄舊棘門樹老有人頻繫
馬江空無地為招魂生前不愧君臣義死後應全父
子恩艤櫂辦香塔下拜仰天一嘯海雲昏

范昌齡

蘇臺舉人

四門交戰皖城危不封降旗自刎時百矢中瘡穿髀
肉一塘清水照僵屍節窮元季真難得忠著

皇明合表之惟惜青陽遺稿在早無文字辨華夷

羅維

滇南舉人

經綸才氣抱中和出鎮江淮履險多銖石矢心擊日

月風塵捲面枕兵戈許身節擬溫廷皓敵愾功高馬
伏波忠義褒揚逢

聖主千年英烈壯山河

阮濤

安南人

元鼎將歸國步艱城危援絕恨天慳草埋戰血三年
碧日耀真心一寸丹成敗何須論利鈍死生應不愧
江山幾多食祿偷生輩千載聞風膽亦寒

無名氏

節表忠宣百世垂當時血戰號能師兵戈四合可堪
敵國步多艱信莫支父子全忠同效死君臣大義已
無虧只爭欠讀南陽表漢賊猶須仔細推

李天爵

本府人

蟻盜環攻已扼援西門勢惡獨當先不辭中臂十餘
刃支柱孤城六七年起火已知無空地引刀只欲訴
蒼天乾坤一統歸真
主泉下英魂尚屬元

陳勉

黃巖人桐城知縣

七載民歸保障恩身亡城陷竟誰援慨瞻威勇思千
古擬閻忠勳欲萬言江上有祠春奠藻山前無鬼夜
衝寬篲燈若共青陽坐應勸先生不仕元

鄭節

廣信人御史

左衽那堪被袞龍百年羶氣污華風中原義旅皆豪

傑夷裔孤臣類梗蓬闔室盡從同日死殊恩追錫上
公封舒臺相對祠長在不負青陽講學功

吳本清集古懷寧人監利訓導

死守孤城志益堅讀古今忠義一門全詩七年戮力

無閑日竟萬古知心只老天詩廢館有名春寂寂詩

古碑無字草芊芊群誰知我亦輕生者杜感慨題

詩慕昔賢瓶

李璉

懷寧人贛州知府

奇材天遣障舒州一劍指生海宇秋妻子闔門爭取

義江山千古尚含愁臥龍有廟依先主扼虎無顏見

侯自是斯文多慨感幾回瞻拜淚交流

危容

懷寧人大鍾評事

死節勛名天地知英雄到此是男兒一門妻子循彝

教萬古臣工作表儀黃甲有光經濟策青陽無恙簡

嚴祠大元人物知多少誰似先生獨擅奇

許銳

山東人御史

考亭絕學道將窮却喜先生載得東排難獨當三面

敵臨危竟死一門忠孤城墮斃天應遠清水淒風血

尚紅只有英魂依白日光華千古照晴空

吳裕

餘姚人御史

元季群雄爭逐鹿儒臣此際統三軍守城百戰七年

事仗節一門萬古聞拱木迎風枝尚勁孤墳埋玉草

猶芬我來拜奠荒祠下細讀窮碑太史文

夏英

吉水人工部郎中

想像儀刑未易描却憐身並亂離遭始終節梗冰霜
勵妻子忠貞日月高千古不慚唐許遠孤城獨抗趙
雙刀還憐不負將軍者幾個知名附紫毫

袁經

長沙人御史

江北江南寇賊盈七年分間障孤城驅民捍敵畔還
戰報國捐軀死亦生萬古精忠天地鑒一門全節日
星明英雄烈烈歸何處古木寒鴉繞故塋

楊茂元

四明人本府知府

小構亭臺古墓東落成聊寄此杯中江分南北供遐

眺人合賢思仰至中草木變哀多慨感山川割據興

英雄此生幸際

重熙運稽首

皇家混一功

丁程

九江守備都指揮

元祚將顛赤手扶江城堅守寸忠孤七年血戰兵威
振一旦捐軀志節據圭璧毅卒齊卞壺經綸事業小
夷吾

聖朝褒祀明如日山水增光風烈殊

顏祿壽

巴陵人本府同知

治亂相尋理自然公遭元運正將顛捐生大義全家

畫秉節真心萬古傳
清水有塘神已鶴
荒祠無後淚
成鶴我來拜掃佳
城下榛蕪于今不似前

程倫

太湖人周化知縣

出守孤城歲月深
肯隨流俗共浮沉
一家効死俱全
節百戰臨危不易
心時去已亡秦
苑康運終空起傳
岩霖興迴獨立揮
戈地屢動哀吟似不禁

王昂

吉水人

華亭如鼓大江東
百里山河入望中
人為達觀增傑
構天留勝境付孤
忠松風不盡平生
恨梧月真如蓋
世雄試問登亭感
恩意萬年引水灌
城功

汪齡

黃巖人府學訓導

保障江淮七歲中
睢陽絕援勢應同
身膺百戰渾無
怯節盡一門却有
終公瑾非無驅魏
策阿蒙亦建襲
關功皖山多少英
雄骨千古行人獨
景忠

黎鳳

新喻人巡按御史

天厭華風夕墊胡
聚妖翻作負山圖
也知秦運歸
真主可使寰區無
烈夫人面豈隨時
事改江流不盡
士心孤長松古栢
寒塘路慨慷高亭
日欲曠

五言排律

王演

仲沔臨清人元中書左丞

贊美材兼俊言温
氣又和東都觀國
俗西夏別沙陀
禁圍瞻丹鳳番車
駕紫駝好奇稽古
博動學讀書多

策府超先進文章決右科義文占得失周禮補差訛
阜寧減天憲彤庭奏諫坡一紆歸正大庶務去繁苛
雖有能官列將知暴客何割斧司斧鉞移鎮出淮渦
道曉豹當路環舒虎間窩犬牙牢置柵廉角密張羅
隔陣豨衝突交鋒蟻戰柯砲丸轟霹靂千羽舞婆娑
傍岸飛神矢中流走賊舸犒軍頻割犢振凱幾吹螺
卒伍同甘苦賓僚共咲呵馮旗須問卜襍厲許驅儼
編戶因攤稅均田欲種禾劫盟完趙薛變法沸秦鍋
床幻莊周蝶籠收道士鵝九宮憲旨醴諸部及恩波
馬上朝橫梁城頭夜枕戈柳營修器械斧館習絃歌
鐵帛交洪鄂狼儲折海嶼赤盤青莫覓午飲綠包荷

寇退鷲聞柝兵旋喜聽鐸野風掀帳塗雪沒征靴
老宿時咨議英髦日切磋殊勲追李郭名教仰丘軻
博獨專存養瘡痍徧撫摩韜鈴尊呂望亭徽比廉頗
炯炯寸心赤蕭蕭雙髮皤索約懸車獄抔土障黃河
洞白近分曉彼蒼俄薦 外姦通秘號內究唱搗訶
兇醜連年闕玉師頃刻嗟苟全還有魯豈死更無它
坎井藏滄渤方塘伏汨灑餓夫罹歎歲羸躄道沉疴
塊魄馮精衛威靈仗太阿戎裝猶環甲章佩罷鳴呵
婦殮悲高里兒傷痛蓼莪株墳羞謁拜祠宇怕經過
簾靜下霜葉塔閣深綠莎矮牆並雨蘇喬木掛烟蘿
錫爵門雖對褒功石未磨詛辭增感慨受福額猶那

默然窺容貌，潛潛墮涕池。衡杯思對酌，聯句記重哉。
麟閣誰圖像，烏輪自擲梭。龍山壯忠節，千載勢雄哉。
王沂子與廬陵人做士

百戰孤城陷，先生獨有祠。勲名班左轄，心胆恣彭軻。
已矣英雄死，傷哉國步危。魚麗荒草沒，虎落墜藤枝。
短日紆長策，高風繫遠思。文章傳異代，事業貫穹碑。
嶺嶺遺氓薦，松楸過客悲。乾坤新曆數，社稷舊陵夷。
傳入今朝史，歌餘古樂祠。有懷因感激，千載重民彝。

王伯真

廬陵人 瓊州知府

忠節可垂世，余侯兼有之。科名既表表，文彩復離離。
攻事動無怠，操持凜不淄。霜臺肅令具，墨壘仗旌麾。

憶昨崩騰際，予今又老思。疲民輸死力，羸卒失瘡痍。
力屈心逾壯，時危義不虧。孤城紆戰策，一死重民彝。
史籍新添傳，承當舊有祠。高風不可及，題句寫余悲。

鄒律

本府人 襄陽知府

元祚將移日，孤臣獨奮時。赤心惟不二，白壁欲無疵。
金革通宵衽，冰山累卵危。狼烟顛最急，烏陣勢何依。
大相甘膚抗，剝盡忍面欺。真符遙兆象，偽將每交綏。
敗卒疽頻吮，殘民力更疲。杜回猶結草，魯女尚憂葵。
武士心持虎，環人掌鼓師。登城衝矢石，斬敵賞偏裨。
雲鎖山川暗，風催鼓角悲。微王連巨艦，樓項作長城。
自擬身當櫓，誰拚骨解鴈。援澤寧後殿，糧絕不先炊。

事孝子俱投水衣冠盡染泥舉家知報國繼世為刊碑
大節昭青史精魂怨綠籬

聖明加寵錫時祀享多儀感激英雄志催驅暴酷私
名高空宇宙德盛厚民彝非但人中傑直為天下奇
領子何似者揮淚寫新詩

七言排律

丁鶴年

西域人

將軍足馬入舒城擊賊頻傾訓義兵孝以保家忠狗
國聚而出戰散歸耕園伴月暈無全隙捷振天威有
大鼓游說飛書徒問謀推誠仗節愈堅貞雲梯屢却
妖氛豁露布交馳殺氣平千里荆陽憑保障七年淮

海賴澄清山深傑偷殲還出江闊鯨鯢斬又橫外援
內儲俱斷絕累創飲血獨支撐天昏苦霧埋塋壘日
落陰雲捲旆旌甘與張巡為厲鬼肯同王衍誤蒼生
三千將士皆從死百二山河亦繼傾靜對風霆思號
令遙從箕尾識精誠頌碑不愧詞臣色哀詔偏傷
聖主情願為執鞭生不遂臨風三酌重露纓

林和

致中合肥人沂州知府

身嗟運去國嗟賢勇氣凌雲出保邊九地潛兵孫子
屈六韜大將呂公專浙東食憲姦貪屏淮甸摧鋒號
令傳甲冑虜龍尊五位戈矛挽日廉中天捨生取義
生前許誓死求仁死後全恩桂坊存金斗治青陽傳

屬玉堂編滿門仗節真堪頌萬戶同心足可鑄回首
乾坤頌忠烈上輝千古下千年

先生故宅在合肥城中西北隅今為縣廨有惠
桂坊尚存蓋元統癸酉中科時賜額也

王周

縣章人合肥教諭

孤天懸門髮勝銀平生聽察動如神文章驅虎潛山
曉德政緩民泗水春獨守孤城將墜日遠令群敵慙
驚魂恩深士卒皆殊死道重妻孥肯獨存節義昭昭
懸日月毅華焯焯滿乾坤張巡事業寧多見卞壺勲
名得共論歿世有榮歸祀典當時無負賜儀尊貞心
萬古舒江上一色長天自不暉

吳宗周

宣城人

嶺嶽風輕野水晴維舟乘月拜余卿矢心殄賊挺身
出勵衆狗城歃血盟自古江淮為戰地到來忠義屬
儒生皖江不瀉英雄恨留作狂瀾沸不平
七載孤城歛倏危兵疲力盡可能去裹瘡二百餘戰
處報國一門全節時壯氣直凌星斗動餘哀猶使路
人悲至今廟食忠魂慰誤國奸回知不知

王應桂

閩人本府通判

江淮千里控孤城丞相訐謨拒寇兵勢急豈徒甘死
守身危猶自望功成一門忠孝從容盡百代綱常感
慨生我具束芻聊吊古冷風松檜凜秋聲

極目高亭島嶼開
拜瞻遺像淚盈腮
山光有意長縈繞
潮水無情自去來
坏土淒涼征雁斷
蒼松拂鬱鬱
鵑哀

明時祀典春秋盛
正氣漫漫鵑暮臺

青陽先生忠節附錄卷之一

